

學渣與學霸的邂逅

作者: cain

Powered by [紙言](#)

— .

「如我知錯，可否乃念最初~」，我叫阿矢我同平時一樣聽住歌返學，我諗好似我呢啲A0仔都唔會有女仔好似歌詞入面咁管我架啦。

「喂!傻仔，你上年考試考得咁垃圾都升都班，真係夠晒-6呀。」

呢個煩人就係我好兄弟阿生。

「大佬，我都知我上年考得垃圾，就係咁先大鑊呀，我收到風今年文科班班主任係林sir呀，我聽D師兄講過林sir睇學校惡晒架。」

「哈!咁你死硬啦，做定心理準備由F.4開始留足三年堂啦，陰公豬囉。」

「頂你呀!做人唔好咁串好啲。」

返到學校證實咗真係林sir做我班主任。

「Shit!真係林sir做我班主任，一入課室就見到林sir用嚴厲的眼神啤住我。」

「我幫你哋分好坐位啦，跟返坐位表坐。」

痴線架一開學就整好份坐位表，呢啲嘢唔係開學後一星期先做架咩。

「哦，好呀。」

嘩!頂你呀，坐老師枱前面，咁咪無得馴覺，右邊就係個傘架，只能夠希望坐我左邊嗰個係女啦。試問有邊個唔想隔離係女神呀。

咦，個女仔幾靚啲，搞錯唔係。喂，坐我隔離條友遲到啲，咁都唔方係啲咩好學生啦。

「唔好意思呀，我遲到。」

「搞錯呀，開學第一日遲到!」

條女都勁啲第一日就遲到，但係佢睇落去唔多似壞學生啲。

咦，佢過緊嚟啲，竟然係佢坐我隔離。

佢望咗我一眼之後即刻望返前面，避開我嘅眼神。

第一日都係派吓通告咁，但係佢好似無咩朋友同佢傾偈嘅

「勁悶囉，但係居然係女仔坐你隔離，條女又唔差，勁眼紅囉」

「阿生，說話就唔係咁講啦，係人都知我嘅目標係溝校花啦。」

「你今晚咪溝到囉...發夢個陣。」

「睇吓邊個笑到最後。」

雖然講係咁係講，但係我都唔識校花，咁點溝啊。

「話時話who is 校花。」

「頂你咩，校花咪係.....學校好似無校花架啫」

阿生用鄙視嘅眼神望住我

「哦~咁你去溝空氣啦。」

二.

唉~想當年有個算命佬同我講你成個中學生涯都出唔到pool，所以我成個中學的目標就係要出pool，我唔係要證明我有幾威，而係要話比人聽我唔見咗嘅囉野我自己可以擺得返!(mark 哥通)
當然其實我覺得中學生拍拖可以捱到結婚係一件好浪漫嘅事啦。
日子一日一日咁過，我同嗰個女仔都無傾過偈，但係原來佢同我都係讀中史，同埋原來佢個做晴子。

「喂，陣間中史堂教咩呀?」

「你...你問我?」

「除咗你仲有邊個呢，小姐。」

「唔好意思呀，陣間好似係教.....唔好意思呀，我咁講無惡意，但係今日無中史堂啫。」

「I know。」

「吓...」

「無呀，開咗學一個月都無點同你講過嘢，咪撩吓你囉。」

最怕空氣突然安靜~

「同埋你唔使成日講唔好意思架。」

「真係唔好意思呀。」

「...無嘢啦...」

佢唔識聽人話?

「我想知點解你平時無同人傾偈嘅。」

她刻意避開我嘅眼神

「可能係我唔識同人溝通啦，但係我都唔介意。」

「唔係呀，你而家都可以同我傾偈。」

她尷尬地望着我，完全無留任何話口比我，我都放棄繼續撩她說話

「阿生，你話點樣先可以有多啲朋友呢?」

「吓，你有我仲唔夠咩。」

「sorry，I' m not gay。」

「講笑啫。」但係其實我覺得阿生唔似講笑

「但係你仲咩咁問架嘅?」

「其實係晴子。」

「哦~坐你隔離嗰個，但係關佢咩事呢?」

「唔係呀，原來佢無朋友架。」

「咁關你咩事呢，唔通你...」

「你唔好諗多咗啦，我係覺得佢好慘啫。」

「咁你做佢朋友囉。」

「但係唔係女仔做佢朋友好啲啫。」

「你諗你啦，but 如果你想佢有多啲朋友可以叫佢主動同人講嘢囉。」

「阿婷!」我突然大叫

「jm9 呀 掛住阿婷?」

阿婷係我哋班嘅班長，佢為人友善，受歡迎，多朋友.....

「我覺得可以搵佢幫忙。」

「咁呢啲重任就交比我啦。」阿生突然同我講
「咁交比你啦。」當係個機會阿生識女仔
自己和別人較重視那樣，可惜在我的世界並沒有自己

「喂，咖啡小子。」
我背後響起了一把女聲
當我回頭一看，原來是阿婷
「你做咩叫我咖啡小子呀？」
我個名係樊辛矢呀。如果你覺得太難讀可以叫我阿矢，但係唔好叫我咖啡小子。」
「點解呀，咖啡小子呢個名咁得意。」她疑惑地看着我
「其實係邊個同你講我有呢個名架？」
「咪阿生囉。」
果然係佢
「咁你知唔知點解我會有呢個名呀。」
「因為鍾意咖啡？」
「呢個其一啦，同埋我以前試過因為無飲咖啡然後上堂嗰陣暈咗，跟住就比人改咗呢名。」

而家記起都覺得好白癡，居然會因為無飲咖啡所以暈倒

「吓，咩你咁廢架。」
唔好意思唔記得講，阿婷份人勁直接
「你咁講超hurt囉。唔係嗰，你搵我做咩呀。」
雖然我估到佢搵我做咩，但係我循例都要扮唔知嘅
「無~阿生同我講咗啦。」估唔到阿生又幾幫到手嗰
「你想追睛子呀嘛。」
WTF 究竟阿生同婷講咗啲咩
「我唔係想追睛子呀，我係想幫睛子搵朋友咋。」

「吓，係咩，但係阿生明明唔係咁同我講架嗰，唔通阿生呃我。」果然阿生都係靠唔住
「算啦，你咁為睛子着想，應該都有啲嘢嘅。」
我feel到如果唔快啲入正題，佢會一直纏繞係感情呢個話題
「你想點諗咪點諗囉，但係不如我哋入正題呀，我哋可以點幫睛子呀。」
「咁你知唔知下星期四係咩日子呀。」
「下星期四咪係學校旅行.....呀!係嗰。」

我終於到如夢初醒~

「只要我哋同睛子一組，就可以乘機同睛子做朋友，然後自自然然睛子就同我哋嘅朋友做朋友。」
「我驚係阿生乘機溝你咋。」我勁細聲講
「你講咩呀?係男人講嘢就大聲啦唔該。」
「無嘢，覺得個計劃幾好啫。」
「好啦，咁你記得邀請睛子啦。」
「吓，我去？」
「of course 啦，唔係以後唔幫你架。」
咁即係威脅啫「咁好啦...」

她推了我一把，而目的地是天堂還是地獄？